

TABULA 410.

SILENE DISCOLOR.

SILENE petalis bipartitis angustatis; appendiculis emarginatis, calycibus villosis, foliis obovatis, caulibus diffusis.

In insulâ Cypro. ☉

Radix teres, albida. *Herba* pallidè virens, undique hirsuta, viscida, multicaulis, vix spithamæa. *Caules* diffusi, supernè sæpè bifidi, vix unquam dichotomi, crassiusculi, teretes, foliosi, rubicundi, apice spicati, parùm racemosi. *Folia* obovata, obtusa, convexa; basi villosa, subpetiolata, connata. *Flores* brevissimè pedunculati, erecti, *bracteis* binis, parvis, ovato-lanceolatis, inæqualibus. *Calyx* clavatus, densè villosus. *Petalorum unguis* sursùm dilatati; *appendiculæ* divaricatæ, emarginatæ, albæ; *laminæ* bipartitæ, laciniis lineari-oblongis, obtusis, suprâ incarnatis, subtùs virescentibus, venosis. *Receptaculum proprium* calyce triplò vel quadruplò brevius. *Stamina* cum *stylis* calyce inclusa. *Capsula* ovata, lævis, ore sexdentato.

a. Calyx.
c. Petalum auctum.

b. Flos, avulso calyce.
d. Pistillum.

TABULA 411.

SILENE THYMIFOLIA.

SILENE petalis bipartitis angustatis; appendiculis emarginatis, calycibus hirtis glutinosis, caulibus procumbentibus lignosis ramosissimis.

Lychnis marina, floribus candidis subtùs purpureis, auriculæ muris foliis. *Cypri. Panph. ed. 1. v. 1. t. 19.*

In Cypri insulæ, et Cariae, arenosis maritimis. ♀.

Habitus a præcedentibus diversus. *Caules* lignosi, prostrati, ramosi, longissimi, teretes, nodosi, grisei, obsolete pubescentes, *ramulis* herbaceis, adscendentibus, pubescentibus, foliosis, spicatis, paucifloris, palmaribus, vel spithamæis, basi interdùm subdivisis. *Folia* ovata, acuta, parva, crassa, ciliata, quandoque hirsuta, cum fasciculis axillaribus minorum. *Flores* terminales, duo vel tres, sessiles, cum alio inferiore, longiùs pedunculato; omnes basi bracteati, majusculi, erecti. *Bracteæ* calyci approximatae, parvae, ovatae, acutæ, glabrae, ciliatae. *Calyx* clavatus, virescens, undique densè villosus, viscidus, nervis decem rubris. *Petalorum unguis* cuneato-oblongi, albidus; *appendiculis* albis, subdistantibus, bifidis; *laminarum* laciniis linearibus, obtusis, suprâ niveis, sub-